

इवनिंग डोगरी न्यूज़ बुलेटिन

समे .18:15 Hrs

<><><><><><>

### Headlines

1. प्रधानमंत्री नरेंद्र मोदी होंरें जम्मू-कश्मीर दे अपने दौरें दौरान उधमपुर-श्रीनगर-बारामूला रेल लिंक परियोजना दे तैहत चनाs ते अंजी खड्ड आहले ऐतिहासिक पुलें दा उद्घाटन कीता ते कटड़ा ते श्रीनगर बश्कार वंदे भारत रेल सेवा गी झंडी दस्सियै शुरू करवाया।
2. प्रधानमंत्री होंरें आपरेशन सिंदूर दे दौरान बन्ने पारा गोलाबारी करी बड़ा भारी नुकसान झल्लने आहले परौआरें गी 2-2 लक्ख रपे ते सामान्य नुकसान झल्लने आहले परौआरें गी इक्क-इक्क लक्ख रपे दी बाद्दू मदाद दा ऐलान कीता ऐ।
3. लेफ्टिनेंट गवर्नर मनोज सिन्हा होंरें कश्मीर रेल परियोजना दे उद्घाटन गी जम्मू-कश्मीर लेई ऐतिहासिक पल करार दिंदे आखेआ जे कश्मीर रेल सेवा दे उद्घाटन नै जम्मू-कश्मीर दे लोकें दे दिलें गी बाकी दे देसैं कन्नै जोड़ी दिता ऐ।
- 4 जम्मू-कश्मीर दे काबिना मंत्री जावेद अहमद राणा होंरें चंडीगढ़ च लोआई गेदी उत्तर भारत दे राज्यें ते केंद्र शासित प्रदेशें दे बिजली मंत्रियें दे इलाकाई सम्मेलन च शिरकत कीती।
- 5 सर्वोच्च अदालतैं राष्ट्रीय परीक्षा बोर्ड गी नीट-पीजी 2025 दा म्तेहान त्रै अगस्त गी इक्कें शिफ्ट च आयोजित करने दी इजाजत देई दिती ऐ।

<><><><><><>

### PM-Projects

प्रधानमंत्री नरेंद्र मोदी होंरें अज्ज कटड़ा थमां 46 ज्हार करोड़ रपे दियें कई सारी विकास परियोजनाएं दा नीह पत्थर रक्खेआ ते केई परियोजनाएं दा उद्घाटन ते लोकापर्णन कीता। जम्मू-कश्मीर दे अपने दौरें दौरान श्री मोदी होंरें चनाs दरेआ पर दुनिया दे सब्बने शा उच्चे रेल पुल ते अंजी खड्ड आहले भारत दे पैहले केबल आधारित रेल पुल दा बी उद्घाटन कीता। एह दौनें पुल उधमपुर-श्रीनगर- बारामूला रेल लिंक परियोजना दा गै हिस्सा न। 272 किलोमीटर लम्मी इस परियोजना पर तकरीबन 44 ज्हार करोड़ रुपें दी लागत आई दी ऐ ते एहदे तैहत 36 सुरंगें ते 943 पुलें दा निर्माण कीता गेदा ऐ। अपने दौरें दौरान प्रधानमंत्री होंरें कटड़ा ते श्रीनगर गी जोड़ने आहली वंदे भारत एक्सप्रेस ट्रेन गी कटड़ा रेलवे स्टेशन थवां झंडी दस्सियै रवाना करवाया। एहदे शा पैहले श्री मोदी होंरें इस ट्रेन च स्कूली बच्चें ते मुतल्लका रेलवे अमले कन्नै गल्लबात कीती। प्रधानमंत्री होंरें कटड़ा थमां गै वर्चुअल ढंगै कन्नै कई सारी शिड़क परियोजनाएं दे नीह पत्थर रक्ख ते कई सारी परियोजनाएं दा उद्घाटन बी कीता। इंदा मकसद जम्मू-कश्मीर दे दूर-दरेडे खासतौरा पर बन्ने आहले इलाकें तोड़ी संपर्क स्थूलत उपलब्ध करवाना ऐ। श्री मोदी होंरें रियासी जिले च 350 करोड़ रपे दी लागत कन्नै बनने आहले पैहले मेडिकल कॉलेज-श्री माता वैश्या देवी इंस्टीच्यूट ऑफ एक्सीलेंस दा नीह पत्थर बी रक्खेआ। इस इदारे कन्नै खिते च सेहत दिक्खभाल आहला ढांचा होर मजबूत बनोग।

## PM-Address

प्रधानमंत्री नरेंद्र मोदी होरें कटड़ा च कई विकास परियोजनाएं दा उद्घाटन करने परैंत किट्ठ अग्गे भाशण दिता। अपने भाशण दी शुरूआत मोदी होरें डोगरी भाशा च श्री माता वैश्वो देवी जी दी जय आखदे होई कीती।

मोदी होरें आखेआ जम्मू-कश्मीर च विकास बाददा कदें बी नेई रूकोग ते अज्ज जेहड़ी परियोजनाएं दा उद्घाटन कीता गेआ ऐ ओह प्रदेश दी विकास जातरा गी इक्क नमी रफ्तार देडन। उनें जम्मू-कश्मीर गी भारत दे सिर दा मुकट करार दिता ते आखेआ जे कश्मीर थमां लेइयै कन्या कुमारी तोड़ी पूरा मुख्य हुन रेल नेटवर्क दे राहें आपूं ‘ च जुड़ी गेआ ऐ। उनें आखेआ।

इस मौके पर प्रधानमंत्री होरें जम्मू-कश्मीर दे लोकें दी बी सराहना कीती। उनें आखेआ जे जम्मू-कश्मीर दे लोक जिस चाल्ली कन्नै पाकिस्तान आसेआ करवाए गेदे पैहलगाम आतंकी हमले दे विरोध च इक्कजुट होइयै खड़ोए न, एह प्रदेश दे लोकें दी दलेरी गी दर्शादा ऐ। श्री मोदी होरें आखेआ जे जम्मू-कश्मीर दे नौजवानें हुन आतंकवाद गी बनकदा परता देने दा मन बनाई लैते दा ऐ।

इस मौके पर प्रधानमंत्री होरें आपरेशन सिंदूर दे दौरान बन्ने पारा गोलाबारी करी नुकसान झल्लने आहले परौआरें गी 2-2 लक्ख रपे ते सामान्य नुकसान झल्लने आहले परौआरें गी इक्क-इक्क लक्ख रपे दी बाददू माली मदाद दा ऐलान कीता। श्री मोदी होरें आखेआ जे बन्ने आहले इलाकें कश रौहने आहले लोक स्हाड़ी सरहदें दे पैहले रक्षक न। उनें आखेआ।

## LG (byte)

लेफ्टिनेंट गवर्नर मनोज सिन्हा होरें कश्मीर रेल परियोजना दे उद्घाटन गी जम्मू-कश्मीर लेई ऐतिहासिक पल करार दिंदे होई आखेआ ऐ जे एह कश्मीर थमां कन्या कुमारी तोड़ी अखंड भारत दे सुखने गी पूरा करने दी दिशा च पुट्टी गेदी इक्क बड़ी बड़्डी गैंs ऐ। उनें आखेआ जे कश्मीर रेल सेवा दे उद्घाटन नै जम्मू-कश्मीर दे लोकें दे दिलें गी बाकी दे देसै कन्नै जोड़ी दिता ऐ ते एह गैंs खिते दी आर्थिक खुशहाली लेई बत पदरी करोग। चनाs दरेआ पर बनाए गेदे दुनिया दे सब्बन शा उच्चे पुल ते अंजी खड्ड आहले पुल दे उद्घाटन ते कश्मीर लेई वंदे भारत रेल सेवा गी शुरू करवाए जाने मगरा बोलदे होई एल.जी होरें इनें नमें ढांचें गी तरक्की ते गर्व दा इक्क टकोहदा प्रतीक करार दिता। उनें आखेआ।

इस मौके पर रेल मंत्री अश्विनी वैश्वणव, केंद्री मंत्री डॉ. जितेंद्र सिंह, मुख्यमंत्री उमर अब्दुल्ला ते सांसद जुगल किशोर शर्मा हुंदे अलावा कई होर गणमान्य लोग मौजूद हे।

## Special-Feature

भारत नै सेवा सुशासन ते गरीब कल्याण दे सिद्धांतें थमां प्रेरित होइयै इक दहाके च टकोहदा बदलाव कीता ऐ। आकाशवाणी समाचार अपने श्रोताएं लेई पिछले 11 बरें च प्रमुख क्षेत्रें च सरकार दी उपलब्धिएं पर केन्द्रित इक विशेष श्रृंखला लेइयै आया ऐ। अज्ज भारत दी सगगोसार संस्कृति ते विरासत दे संरक्षण पर ध्यान केन्द्रित कीता

जा'रदा ऐ। पिछले इक दहाके थमां सरकार आस्सेआ केई ऐसे अभियान चलाए गे न जिंदे च भारत दी सगगोसार संस्कृति ते विरासत दी राक्खी करने पर ध्यान केन्द्रित कीता गेआ। इंदे चा गै इक्क ऐ “आजादी का अमृत महोत्सव” जेहदे च देसै नै आजादी दे 75 बरे पूरे होने दा जशन मनाया ते इस दरान भारत दिएं उपलब्धिएं गी उजागर कीता गेआ। इस्सै चाल्ली “एक भारत-श्रेष्ठ भारत” पैहलकदमी तैहत केई सांस्कृतिक कार्यक्रमें दा आयोजन कीता गेआ जियां जे काशी-तमिल संगमम ते ऐतिहासक महाकुंभ मेला 2025 जेहदे च 66 करोड़ शा मते श्रद्धालु किट्ठे होइयै अनेकता च एकता जशन मनाया। एहदे अलावा 2024 च 23 करोड़ शा मते लोकें योग कार्यक्रम च हिस्सा लेइयै नमें रिकार्ड बनाए ते इसी वैश्विक सतह पर चलाई गेदी इक मुहिम दा रूप देई दिता।

<><><><><><>

#### Rana-Meeting

जम्मू-कश्मीर दे काबिना मंत्री जावेद अहमद राणा होरें अज्ज चंडीगढ़ च लोआए गेदे उत्तर भारत दे राज्यें ते केंद्र शासित प्रदेशें दे बिजली मंत्रियें दे इलाकाई सम्मेलन 2025 च शिरकत कीती। इस कार्यक्रम च बोलदे होई मंत्री होरें केंद्र सरकार गी गुजारिश कीती जे खिते च सख्त मौसमी हालात दरान बिजली दी उचित ते किफायती सप्लाई यकीनी बनाई जा। राणा होरें जम्मू-कश्मीर दे लोकें लेई बिजली दी भरोसेमंद सप्लाई यकीनी बनाने लेई ट्रांसमिशन ढांचे गी तगड़ा बनाने दी जरूरतें पर बी जोर पाया।

<><><><><><>

#### SC-NEET

सर्वोच्च अदालतें राष्ट्रीय परीक्षा बोर्ड गी नीट-पीजी 2025 दा म्तेहान त्रै अगस्त गी इक्कै शिफ्ट च आयोजित करने दी इजाजत देई दिती ऐ। एहदे शा पैहले एह म्तेहान 15 जून गी लैता जाना मुकर्रर होए दा हा, पर बोर्ड नै म्तेयान लैने लेई द'ऊं म्हीनें शा मते समें दी मंग कीती ही। बोर्ड नै त्रै जून गी समें बदाने दी मंग करदे होई इक्क आवेदन दायर कीता हा, जेदे च आखेआ गेआ, जे म्तेयान केंद्रें दी गिनतरी दूनी करने ते सुरक्षा बवस्था दे इंतजाम निगगर करने दी लोड़ ऐ।

<><><><><><>

#### Itoo-Eid Greetings

सेहत ते मेडिकल शिक्षा मंत्री सकीना इतू होरें ईद-उल-अजहदा दे पावन मौके पर जम्मू-कश्मीर दे लोकें गी हार्दिक शुभकामनां दितियां न। अपने बधाई संदेश च मंत्री सकीना इतू होरें आखेआ जे ईद-उल-अजहा बलिदान दा त्यौहार ऐ। एह ना शड़ा आस्था ते मुक्ति दा उत्सव ऐ, बल्के करुणा, विनम्रता ते एकता दे प्रति स्हाढ़ी बचनबद्धता गी दोहराने दा बी समां ऐ।

<><><><><><>

जम्मू दे राई-बाई मैहकमे दे निदेशक डॉ. अरविंदर सिंह रीन होरें सांबा जिले दा व्यापक दौरा लाइयै उत्थें इसलै चला'रदे विकसित कृषि संकल्प अभियान तैहत जारी गतिविधिं दी समीक्षा कीती। इस मौके पर दियानी ग्रांs च इक गल्लबात आले सत्र दा आयोजन कीता गेआ जेहदे च साईंसदानें, करसानें, नोजवानें ते खास करियै महिला करसानें बड़ी बद्ध गिनतरी च हिस्सा लैता। इस मौके पर बोलदे होई अरविंद्र सिंह रीन होरें करसान बरादरी गी अपनी आमदन बढ़ाने आस्तै बन्न-सबन्नी फसलां राहने दा आह्वान कीता। तोआई, मुख्य विज्ञानक ते कृषि विज्ञान केंद्र साम्बा दे प्रमुख डॉ. संजय खजूरिया होरें मीडिया कन्नै गल्लबात करदे होई आखेआ।

<><><><><><>

### Ramban-Food Safety

ईद दे औंदे ध्यार दे मददेनज़र, जिला प्रशासन रामबन ते खाद्य सुरक्षा विभाग आसेआ जिले दिएं बक्ख-बक्ख थाहें पर निरीक्षण सरबंधी अभियान चलाए गे तांजे खाने-पीने आहली चीजें दे मय्यार गी जकीनी बनांदे होई कारोबार दे माड़े तौर-तरीकें गी रोकेया जाई सकै। खाद्य सुरक्षा विभाग नै इस मौके पर बक्ख-बक्ख हट्टिं दा दौरा लाया ते चीजें दे भाएं, गुणवत्ता ते बिक्री वगैरा दी जांच कीती। नियमें दी उल्लंघना करने आहले केई दकानदारें पर जुर्माना बी नाफिज़ कीता गेआ। इस्सै चाल्ली बटोत च बी इक निरीक्षण अभियान चलाया गेआ जेहदे च मैहकमा राजस्व, खुराक, मुंसिपल्टी ते आबकारी मैहकमें दे अधिकारी शामिल होए। इस सरबंधै च आकाशवाणी समाचार कन्नै खास गल्लबात करदे होई रामबन दे खाद्य सुरक्षा अधिकारी बलबीर सिंह होरें आखेआ

<><><><><><>